

## Dithero tsa Tirelano mo Kutlwanong

33/2014 Ka Moletlo wa kgoromeletso ya Mowa o o Boitshepo, e le ka 08. 06. 2014

### **MO LEINENG LA MODIMO O E LENG RARA LE MORWA LE MOWA O O BOITSHEPO!**

1. Sefela sa 149 - 132/ -

**2. Thapelo:** Morena, Modimo, Mong-wa-thata-yotlhe, re atamela fa pele ga sefatlhego sa gago gore re utlwe Lefoko la gago. Morena, re a leboga, ka o setse o weditse tiro ya gago ka go re pholosa ka loso lwa ga Morwao Jesu Keresete ka loso lwa gagwe mo sefapaanong, le ka go tsoga ga gagwe mo losong, yo ya reng a sena go tthatlogela kwa legodimong, a roma Mowa wa gagwe o o Boitshepo mo go rona gore o re kopanye le wena, o re itshepise, o re gogele mo tumelong ya go dumela gore Jesu ke Morena le Mopholosi wa rona. Ke gona re kopang le kajeno, re re: O re tiise mo tumelong ka thata ya Mowa o o Boitshepo gore re nne le botshelo jo bo sa khtuleng mo go wena mo legodimong. Amen.

3. Epistolo ka fa thulaganyong ya 2 e kwadilwe mo go Ditiro tsa baapostolo 2:1-18;

Efangele ka fa thulaganyong ya 1 e kwadilwe mo go Johane 14:23-27.

4. A go ipolelwe tumelo ya bokeresete!

5. Sefela sa 156 - 139/140

6. Thapelo ya mmadi wa thero.

**7. Epistola** ka fa thulaganyong ya 6 e kwadilwe mo go Baroma 8:1-11, e re: "Jaanong he, ga go na katlholo ya tatlho epe mo go bone ba ba mo go Keresete Jesu, ba ba sa tsamaeng ka fa nameng, mme ba tsamaya ka fa Moweng. Gonne molao wa mowa wa go tshela ka Keresete Jesu o nkgolotse mo molaong wa bolelo, wa loso. Gonne se se reteletseng molao, ka o se na thata ka ntlha ya nama, Modimo o se dirile, wa atlhola bolelo mo nameng ka go roma Morwaaona mo tshwanong ya nama ya bolelo le ka ntlha ya bolelo, gore tshiamo e e batlwang ke molao e dirafale mo go rona ba re sa tsamaeng ka fa nameng, mme e le ka fa Moweng. Gonne ba ba leng ka fa nameng ba

batla tsa nama, mme ba ba leng ka fa Moweng bone ba batla tsa Mowa. Kana go batla ga nama ke loso, mme go batla ga Mowa gona ke botshelo le kagiso. Gonne go batla ga nama ke go tlhoa Modimo, ka e sa ikokobeletse molao wa Modimo, e bile e a palelwa. Ba ba mo nameng ga ba ka ke ba kgatlha Modimo. Mme lona ga lo mo nameng; lo mo Moweng, fa tota Mowa wa Modimo o agile mo go lona; fa motho a sa tshola Mowa wa ga Keresete, yoo ga se wa gagwe. Mme fa Keresete a le mo go lona, mmele o tla bo o sule ka ntlha ya bolelo, mme Mowa ona o tshela ka ntlha ya tshiamo. Fa Mowa wa ona o o tsositseng Jesu mo baswing o agile mo go lona, foo ona o o tsositseng Keresete Jesu mo baswing o tla tshedisa le yona mebele e e swang ya lona ka Mowa wa ona o o agileng mo go lona." Amen.

**8. Thero:** Bandla e e rategang ya Morena wa rona Jesu Keresete, kajeno re dira moletlo wa Pentekoste e e leng moletlo wa go gopola kgoromeletso ya Mowa o o Boitshepo. Ke gore kajeno re gopola tse di bolelwang ka mafoko a Epistolo ya rona ya moletlo wa kajeno a a kwadilweng mo Ditirong tsa baapostolo gore "E rile letsatsi la Pentekoste le tla, ba bo ba le mmogo botlhe felong go le gongwe. Ga utlwala ka tshoganyetso mosumo o o tswang legodimong, e kete wa ledimo le le tsubutlang, wa tlala ka ntlo yotlhe e ba nnang mo go yona. Ga ba ga bonala mo go bone diteme tse di kgaoganang, e kete dikgabo tsa molelo, tsa nna mo go mongwe le mongwe wa bone. Mme botlhe ba tlala Mowa o o Boitshepo ba simolola go bua ka diteme di sele ka fa Mowa o ba buisang ka teng ..." ba bua ka ga ditiro tse dikgolo tsa Modimo.

Phuthego, Mowa o o Boitshepo o re buang ka ga ona fano ke mang? Mowa o o Boitshepo o re buang ka ga ona fano ga se mowa gongwe sefelo se se tsubutlang fela; Mowa o o Boitshepo o re buang ka ga ona fano ga se mowa o o tsenang mo bathong ka go taboga, ka go opa diatla, gongwe ka go letsa meropa; Mowa o o Boitshepo o re buang ka ga ona fano ga se mowa o o tsenang mo bathong, fa ba bua ka dipuo tse di sa tlhologangweng ke bautlwi. Mme Mowa o o Boitshepo o re buang ka ga ona fano ke persona ya boraro ya boleng jwa Modimo o o Borarobongwe, o e leng Rara, yo e leng Modimo wa nnete mmogo le Morwa, mmogo le Mowa oo o o Boitshepo. Ke ona o o tllileng mo barutweng ba ga Jesu ka letsatsi la Pentekoste, ke ona o re o amogelang mo kolobetsong, fa re kolobediwa mo leineng la Modimo o o Borarobongwe. Ke ona o o re biditseng ka Efangele gore re dumele mo go Jesu Keresete, fa e le Mopholosi wa rona,

ke ona o o re bolokelang mo tumelong ya nnete, ke ona o o re itshwarelang maleo a rona mo Lefokong le mo disakamenteng, ke ona o o tla dirafatsang tiro ya ona mo go rona ka letsatsi la bofelo, fa o tla re vusa mo losong mmogo le baswi botlhe, le go re abela botshelo mo kgalalelong mmogo le botlhe ba ba dumelang mo go Jesu Keresete.

Phuthego, Mowa o o Boitshepo ke ona o, tiro ya ona ke yona e! O re gogela mo tumelong ya go dumela mo go Keresete, o re kopanya le Keresete, le go re busa, le go re gomotsa. Ke ona re utlwang ka ga ona ka Lefoko le le monate le le re gomotsang mo mafokong a thero ya moletlo wa kajeno a a reng: **"Jaanong he, ga go na katlholo ya tatlho epe mo go bone ba ba mo go Keresete Jesu."** Barategi mo Moreneng, Modimo o re bonye, fa re le batho ba ba mo tatlhegong ka fa tthagong ya rona, ra tsamaya tsela e e yang losong, wa loga maano a go re rata ka go re baakanyetsa pholoso ka Morwaa-ona Jesu Keresete. Ene a tsalwa, re mo tsaletswe, a boga, a re bogela, a swa, a re swela mo sefapaanong, a re tsogela mo baswing gore re itshwarelwe maleo, re pholosiwe, re nne le botshelo jo bo sa khutleng mo go ene mo legodimong.

Phuthego, ke nnete, "Jaanong he, ga go na katlholo ya tatlho epe mo go bone ba ba mo go Keresete Jesu." Ka lebaka la eng? Gonne molao wa Mowa wa botshelo jo bo mo go Keresete Jesu o re golotse mo molaong wa boleo, le wa loso, "Gonne molao wa mowa wa go tshela ka Keresete Jesu o re golotse mo molaong wa boleo, wa loso. Gonne se se reteletseng molao, ka o se na thata ka ntlha ya nama, Modimo o se dirile, wa athola boleo mo nameng ka go roma Morwaaona mo tshwanong ya nama ya boleo" (e seng mo nameng ya boleo, mme e le mo tshwanong ya nama ya boleo fela) "le ka ntlha ya boleo, gore tshiamo e e batlwang ke molao e dirafale mo go rona ba re sa tsamaeng ka fa nameng, mme e le ka fa Moweng."

Phuthego e e rategang, rona ba re dumelang, re pholositsweng mo tatlhegong. Ka moo re tshwanetse go tsamaya ka fa Moweng. Bomorwa Rre, go ntse jang mo go rona? A re ba ba tsamayang ka fa Moweng? Gongwe re ba ba tsamayang ka fa nameng? Ditiro tsa nama di a bonatshega, "e bong tlhalo le boaka le se se maswe le boitaolo le tirelo-medimo e sele le tiriso ya mereo le tlhoano le komano le lefufa le dikgakalo le dikganetsano le diphapaano le dikaogano tsa maitirelo le tsa bopelotshetlha le dipolao le tsa botagwa le mediro ya tshapelo le tse di ntseng jalo, tse ke di lo bolelelang jaaka

nkile ka bua pele ka re: Ba ba dirang dilo tse di ntseng jalo ga ba nke ba rua boswa jwa puso ya Modimo,” Bagal. 5:19-21.

Phuthego, Lefoko le re: Ba ba mo nameng ga ba na go itumedisa Modimo. Ka moo “tsamayang ka fa Moweng, foo ga lo ne lo dirafatsa dikeletso tsa nama, gonne nama e eletsa tse di tlabanang le mowa, le mowa o eletsa tse di tlabanang le nama, dilo tse di a emalalana gore lo se ka lwa dira tse lo di ratang,” Bagal. 5:16-17. Phuthego, “Leungo la Mowa lone ke lorato le boitumelo le kagiso le bopelotlelele le bopelontle le molemo le boikanyego le bonolo le boitshwaro le bophepa; dilo tse di ntseng jalo, molao ga o ganetsanye natso,” Bagal. 5:22-23.

Fela jalo phuthego, ke sona se re se utlwang mo mafokong a thero ya rona ya moletlo wa kajeno, a a reng: “Gonne ba ba leng ka fa nameng ba batla tsa nama, mme ba ba leng ka fa Moweng bone ba batla tsa Mowa. Kana go batla ga nama ke loso, mme go batla ga Mowa gona ke botshelo le kagiso. Gonne go batla ga nama ke go tlhoa Modimo, ka e sa ikokobeletse molao wa Modimo, e bile e a palelwa.”

Badumedi, **“Jaanong he, ga go na katlholo ya tatlho epe mo go bone ba ba mo go Keresete Jesu.”** Ba re dumelang mo go Jesu Keresete, re golotswe, re pholositswe mo tatlhegong e e leng loso lwa bosenangbokhutlo. Ke gona re sa tsamyeng ka fa nameng, mme re tsamaya ka fa Moweng, ee, re a amogela gore Mowa o o Boitshepo o dire mo go rona, o laole mebele ya rona e e swang gore e se ka ya tlhola e direla bolelo. Lefoko le bua jalo le kajeno, le re: “Ba ba mo nameng ga ba ka ke ba kgattha Modimo. Mme lona ga lo mo nameng; lo mo Moweng, fa tota Mowa wa Modimo o agile mo go lona; fa motho a sa tshola Mowa wa ga Keresete, yoo ga se wa gagwe.”

Phuthego, ba re leng ba ga Keresete, Keresete o re rekolotse ka madi a gagwe gore re nne ba gagwe, re nne ka fa tlase ga gagwe mo pusong ya gagwe, re ntse re le mono mo lefatsheng gore mo bofelong re nne mo pusong ya gagwe e e se nang bokhutlo mo legodimong, e tla re re sena go tloga mo lefatsheng leno.

Go ntse jalo, phuthego, ke sona se se rewang ka mafoko a bofelo a thero ya moletlo wa kajeno wa go gopola kgoromeletso ya Mowa o o Boitshepo, a a reng: “Mme fa Keresete a le mo go lona, mmele o tla bo o sule ka ntlha ya bolelo, mme Mowa ona o

tshela ka ntlha ya tshiamo. Fa Mowa wa ona o o tsositseng Jesu mo baswing o agile mo go lona, foo ona o o tsositseng Keresete Jesu mo baswing o tla tshedisa le yona mebele e e swang ya lona ka Mowa wa ona o o agileng mo go lona."

Modimo, Rara wa rona yo o mo legodimong, a o re thuse rotlhe ba re phuthegetseng mo moletlong wa kajeno, o re abele Mowa wa ona o o Boitshepo gore o fologele sešwa mo go rona, o re kopanye ka metlha le Jesu, o re buse, re se ka ra tsamaya ka fa nameng, mme re nne re tsamaye ka metlha ka fa Moweng. Ee, a re boleleleng le ba bangwe, bogolo ba ba iseng ba dumele mo go Jesu, re re: **"Jaanong he, ga go na katiholo ya tatlho epe mo go bone ba ba mo go Keresete Jesu"** gore le bone ba tlabologe, ba dumele, ba kolobediwe, ba pholosiwe ka ene Jesu Keresete yo o kileng a swa, a ba a tsoga ka ntlha ya rona rotlhe. Amen.

**9. Thapelo:** Morena, Modimo, Rara wa rona yo o mo legodimong, re lebogela Lefoko la gago le le boitshepo le re tswang go le utlwa. Morena, o re fe Mowa o o Boitshepo gore o nne mo go rona, o re sedimosetse, o re buse, o re goge, o re tiise mo tumelong, re nne re tsamaye ka metlha ka fa Moweng, gore e tla re bofelo jwa botshelo jwa rona mo lefatsheng bo tla goroga, o re tsose mo leroleng, o kopane le rona, o re etelele pele ka go re gorosa mo botshelong jo bo sa feleng, jo re bo baakanyeditsweng teng ke Jesu Keresete, Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 157 - 140/141

A kagiso ya Modimo e e fetang thaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen. Thero eno e kwadilwe ke F. J. Mtshali ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.